

Cuminsa scoge bo batayanan of bo lo keda bringa pa semper



ORANJESTAD - Mi hendenan! Nos t'ey, disfrutando di vakantie riba un chill. Un poco mas cu un siman riba Aruba y tiki tiki mi ta cuminsa corda dicon ma bay bon leu. Hahahaha! No, cos serio. Mi stima e isla pero full Aruba merece ta un serie riba Netflix paso esta un drama.

E parti mas dushi di ta na cas ta cu semper tin hende rond, e parti menos dushi

ironicamente tambe ta cu semper tin hende rond. Ken mester Keeping up with the Kardashians si bo por djis Keep up cu tur e drama na Aruba? Mi mama su cas ta manera cas di pueblo. Eynan tur hende ta yega. Awe bo ta un stranhero cu a bin bishita e siguiente dia bo ta mi mama su di 100 yiu adoptivo. E pret ta cu unda tin hopi hende, semper tin hopi opinion pasobra cada cabes ta un mundo. E variedad di edad di hende cu frecuencia ta bin mi

mama su cas ta pasa di un extremo pa otro y ami memey di e tempestad purbando di scucha un y tur. Tin esunnan chikito cu djis kier nan tablet, tin e mama cu ta djis duna e yiu un tablet y tin e wela cu ta rabia pasobra tablet ta existi.

Tin e mama cu e yiu gay, tin e yiu cu ta haya leuk cu e ta gay, tin esun cu tin cu menciona Dios cada biaha cu nan bisa e palabra gay. Tin esun cu left and right ta campaña pa Otmar.

Tin esun cu definitivamente no kier sa di Otmar pasobra ta Evelyn ta e cambio. Fuera di esey tin cabrito, pushi y cacho. Enfin, you get the point, tin te hasta un cabrito cu yama

Juanes manera ta artista Colombiano e ta. Hende gusta busca mi boca no, mi ta kere pa malo ora mi ta rond di nan, nan kier touch topiconan cu mi ta apasiona riba dje pa wak ki mi tin di bisa.

Pero bosa, cu tempo bo ta realmente siña scoge bo batayanan, bo ta siña kico ta bal la pena discuti y kico no. Bosnan cuenta cu tur boso teori-anan y boso bestianan artista,

no cansa mi.

Sinta na un bar cu un di mi amiganan un waiter ta bin pasa man den mi cabey.

Mi ta bis'e hopi nechí cu e no por haci esey pasobra e ta invadi mi privacidad, mi cabey ta un parti di mi curpa y e no por mishí sin mi permiso. Djey e ta bira wak e otro waiter cu ta bisa "Si, pero cu e cabey ey bo ta provoca". Mi ta bolbe splica e cu aunke e ta provocante pa mishí cu mi cabey e mester puntra prome. Mi a bis'e cu e tin suerte cu mi ta lief, pasobra un dia e lo haya un cu no lo ta mes lief cu mi y dun'e e zundra cu e merece.

El a bira e tema, cuminsa papia cu si cu cabey no ta importante, cu locual ta importante ta ken bo ta como persona bla bla bla.

Despues el a egt cuminsa bira problematico y el a bisa "Suerte cu bo ta lief, paso imagina bo si bo tabata tin e cabey asina ey anto bo ta un muhe fresco". Ma keda wak e den su cara, purbando di descifra kico e kiermen cu esey. Acaso muhenan cabey diferente ta debe mundo nan

amabilidad? A caso tin cabey cu no ta fit un standard social kiermen tur otro parti di mi si tin cu adapta? Despues cu el a nota mi desinteres el a cambia su tono. El a cuminsa bisa cu na Aruba e unico caminda cu e ta wak hende cu mi tipo di cabey ta na e bar ey. Y den mas cu un ocasion nan ta muchanan chikito. Hey, trankilo, mi ta papian-do di un bar bandi lama cu ta family friendly. Pero bon, mi ta splike cu esey ta mas probablemente ta pasobra asina muhenan cabey afro yega un cierto edad, sociedad ta pone nan bou presion pa nan straight e. Djey el a sigui papia di cabey y hende den su famia cu ta mescla y ki tur sorto di cabey nan tin. El a abstene di bisa palabranan manera "afro" of "crinchi" y na su luga e di "krul chikito chikito". Mi a kinipi wowo cu ne y mi a keda keto. Yiu, mi no ta bay pasa henter mi bida ta discuti cabey cu hende. Un palabra word of advice mi hendenan, si bo wak un muhe cu cabey cu ta yama bo atencion, no mishí cu ne sin puntra. Mind your own business.